

PROFESSION DE FE DEU M22M



Votar a las eleccions de l'UPPA, tà que serveish?

Nosaute·a·s, estudiant·a·s de l'UPPA, votam lo 5 e 6 de deceme 2022 entà elegir los nostes representants e representantas en los conselhs centraus de l'Universitat tà las duas annadas qui vienen.

- Lo **Conselh d'Administracion**, instància dirigenta de la fac qui determinala politica de l'establiment, que vòta lo budget de l'Universitat e qu'eligeish lo president, qui gereish la massa salariau de l'UPPA.
- La **Comission de la Formacion e de la Vita Universitària**, mei consultativa, que s'aucupa de las questions pedagogicas (capacitats d'arcuelh, calendari universitari) o de las activitats culturaus.
- La **Comission de la Recèrca**, qui pertòca los e las doctorantas e la politica de la recèrca.

Sèder en aquestas instàncias qu'auhereish egaument l'accès a sos-comission, com lo **conselh disciplinari** o la **comission d'exoneracion de las despensas d'inscripcion**.

Aquestas instàncias qu'an, doncas, un pes consequent sus las nostas condicions d'estudis. A maugrat de la febla representativitat estudianta en aquestes conselhs, qu'ei possible d'i miar batalhas tà i **preservar/ganhar drets**, o simplement d'i obtièner **informacions utilas a l'ensem de los e las estudiantas**.

Que presentaram, doncas, la nosta lista :

M22M, tàd ua Universitat a gratis, populara, critica, emancipadora, de proximitat e ubèrta a totes e tots.

Lo M22M, çò qu'ei?

Lo Movement deu 22 mars o M22M qu'ei ua platafòrma compausada de l'associacion **Med'Òc** (Movement deus estudiants e estudiantas d'Occitània), deus sindicats **Solidaires Étudiant·e·s Pau** e **CGT doctorant·a·s UPPA**, e d'estudiant·a·s independent·a·s. La nosta lista qu'ei sostienuda per la CGT FERC sup UPPA e per diferentas associacions: l'Arrosoir, Art et Fac, Mars (associacion deus e de las sociològas de l'UPPA), [...]

Lo M22M qu'ei doncas ua lista compausada d'**estudiant·a·s engatjat·da·s quotidianament seus diferents campus de l'UPPA**, contràriament a d'autas listas que non vedem sonque lo dia de las eleccions. Que s'ageish d'un **collectiu locau**, qui n'a nat compte à rénder a instàncias estataus: **be volem decidir tà l'UPPA a l'UPPA!** Qu'ei aquesta libertat qui'ns permet de portar mei plan lo noste projècte mes tanben **las vòstas demandas e chepics** a las instàncias dirigentas de l'Universitat.

Tau M22M, qu'ei per l'accion collectiva e per las lutas quotidianas que poderam cambiar e amielhorar durablament l'Universitat. **Votar a las eleccions de l'UPPA, qu'ei plan, s'engatjar sus los nostes campus, b'ei enqüèra mièlher!** La nosta lista que s'empara sus 8 linhas directoras, qui son las sigüentas:

1. Democratizacion e accessibilitat au saber

Tà l'accès au saber tà tots e totes, independentament de las nostas originas sociaus, geograficas o de situacions de handicap. Atau, que lutam tà la mesa en plaça d'ua vertadèra accessibilitat a l'Universitat, dab mejans d'accès adaptats a las personas en situacions d'handicap. Açò que passa quitament peu refús de la mesa en plaça de tot apèr de seleccion, sia en licéncia o en mastèr.

2. Servici public de qualitat

Un deus pielars deu noste engatjament que s'empara sus la reafirmacion de la mission de servivi public de l'UPPA, com ben collectiu comun tà la produccion e diffusion deus sabers. Que'ns opausam a totes las politics locals e nacionaus que mian a la privatisacion de l'Ensenhamnet Superior e de la Recèrca, atau com a la preséncia de representan·a·s d'enterpresas privadas en los conselhs.

3. Luta contra la precaritat

La precaritat estudianta qu'ei ua realitat, e l'inflacion galopanta non hè sonque agravà-la. 50 % deus estudiants e estudiantas que deven tribalhar a costat deus lors estudis tà subervíver. 1 estudiant-a sus 4 que declara sautar un repaish au mensh un còp per setmana. Los estudiants e estudiantas de l'UPPA que deven poder miar los lors estudis shens deven demandà's quin se neurir a la fin deu mes. Au bèth miei deus conselhs, que defendem per exemple la simplificacoin de l'obtencion de dispensas d'assiduitat o la baishada de las dispensas d'inscripcion, tà anar de cap a la gratuitat entà tots e totas.

4. Universitat de proximitat

La nosta Universitat que deu incarnar lo desvolopament deus país de l'Ador. Tàd aquò har, que deu deféner, diversificar e desvolopar las soas auhèrtas de formacion entà facilitar l'accès aus sabers e non pas contunhar a suprimir daubuns enshamnets e diplòmas, tà perméter a tots e totas de seguir lors estudis shens aver besonh de mudar a Tolosa, Bordéu o París.

5. Universitat en luta contra las oprissions

Entà que l'UPPA e sia un lòc preservat au mièlher de las discriminacions e violéncias racistas, sexistas e LGBTfòbas, qu'avem participat a la mesa en plaça d'ua carta de las associacions. Mes b'ei necessari d'expandir aquestas mesuras a l'ensem deus servicis e d'instalar ua vertadera politica de formacion anti-discriminacion. Que contunharam a deféner los e las estudiantas qui pateishen aquestas violéncias e que perseguiram la nosta luta tà perméter quitament aus estudiants e estudiantas trans de s'inscríver automaticament dab lo lor petit nom d'usatge. Aqueth engatjament que passa tanben per la luta contra l'extrèma dreita suus nostes campus.

6. Diversitat culturau e lingüística

Los nostes territòris que son portadors d'ua diversitat culturau e lingüística en dangèr. La preservacion d'aquesta riquesa qu'ei necessària e que deu estar acompanhada d'ua politica voluntarista de l'UPPA, quitament sus la question de las lengas occitana e basca. L'Universitat que deu estar un lòc ancrat suu territòri e ubèrt suu monde. Lo M22M que sostien tot projècte culturau e ntà la preservacion de las nostas lengas.

7. Plan ecologic e energetic

Que contunharam la nosta luta contra la preséncia d'enterpresas privadas, polluentas e destructoras de l'environament, com TotalEnergie, au bèth miei deus conselhs centraus de l'Universitat. L'Universitat que deu hicar en plaça un plan d'investiement de transicion ecologica dab un bilanç energetic e un plan de transicion de cap a edificis mensh energivòres. Mes aquesta transicion a l'UPPA ne deu pas hà's au detriment de las nostas condicions d'estudis. Atau, que'ns opausam a tota barrada de l'UPPA o copadura energetica per rasons financèras.

8. Recèrca emancipada

La recèrca qu'ei uei miaçada per ua precaritat creishenta deus doctorants e doctorantas qui a creat ua competicion ahuecada tà pòstes de cercaires e enshaires tostemps mensh noumerós. Que pleitejam tà la mensualizacion deu pagament de las vacances, l'ubertura de pòstes perennes e l'exoneracion deus pagaments d'inscripcion tà tots e totas las doctorantas.

Tà aver elegits e elegidas combativas e presentas quotidianament, votem M22M!

Retròba l'integralitat deu noste programa sus: m22muppa.github.io o suus nostes hialats sociaus.

